

文

通

文通卷二十三

明黃岡朱荃宰咸一著

載事

文之作也以載事爲難事之載也以蓄意爲工觀左氏傳載晉敗于邲及楚師寒拊勉之事但云三軍之士煖如挾纊則軍情愉悅之意自蓄其中公羊秦敗於殽之事但云匹馬隻輪無反者則要擊之意自蓄其中若公羊傳載齊使人迂郤克臧孫之事孟子載天下歸舜之事則曰天下諸侯朝覲者不之堯之子

而之舜、訟獄者不之堯之子而之舜、謳歌者不謳歌堯之子而謳歌舜、凡此則意隨語竭、不容致思。

觀檀弓之載事、言簡而不踈、旨深而不晦、雖左氏之富艷、敢奮飛于前乎。如申生爲驪姬所譖、或令辨之、左氏載其事、則曰、或謂太子子辭、君必辨焉。太子曰、君非姬氏、居不安、食不飽、我辭姬必有罪、君老矣、吾又不樂、檀弓則曰、子盍言子之志于公乎。世子曰、不可、君安驪姬、是我傷君之心也。一節僅百五十字、而包括曲折、有他人千言不盡者、非扛千斛、龍文鼎、力

不及此

智悼子未莖晉平公飲以樂杜簣謂大臣之喪重于疾日不樂左氏言其事則曰辰在子卯謂之疾日君徹宴樂學人舍業爲疾故也君之卿佐是謂股肱股肱或虧何痛如之檀弓則曰子卯不樂智悼子在堂斯其爲子卯也大矣檀弓只以十七字盡之興矣載事之文有先事而斷以起事也有後事而斷以盡事也如左氏傳欲載晉靈公厚斂雕牆必先言晉靈公不君公羊傳欲載楚靈王作乾谿臺必先言靈王

爲無道中庸欲言舜好問而察邇言亦先曰舜其大
智也歟孟子欲言梁惠王以其所愛及其所不愛亦
先曰不仁哉梁惠王也若此流皆先斷以起事也如
左氏傳載晉文公教民而用卒言之曰一戰而伯文
之教也又載晉悼公賜魏絳和戎樂卒言之曰魏絳
于是乎有金石之樂禮也若此流皆後斷以盡事也

載文

劉子玄曰夫觀乎人文以化成天下觀乎國風以察興亡是知文之爲用遠矣大矣若乃宣僖善政其美載於周詩懷襄不道其惡存於楚賦讀者不以吉甫奚斯爲諂屈平宋玉爲謗者何也蓋不虛美不隱惡故也是則文之將史其流一焉固可以方駕南董俱稱良直者矣爰洎中葉文體大變樹理者多以詭妄爲本飾辭者務以浮麗爲宗譬以女工之有綺縠音樂之有鄭衛蓋語曰不作無益害有益至如史氏所

書固當以正爲主。是以虞帝思理。夏后失御。尚書載其元首禽荒之歌。鄭莊至孝。晉獻不明。春秋錄其大隧狐裘之什。其理儻而切。其文簡而要。足以懲惡勸善。觀風察俗者矣。若馬卿之子虛。上林。揚雄之甘泉。羽獵。班固兩都。馬融廣成。喻過其體。詞沒其義。繁華而失實。流宕而忘返。無裨勸獎。有長奸詐。而前後史漢皆書列傳。不其謬乎。且漢代詞賦。雖云虛矯。自餘它文。大抵猶實。至於魏晉已下。則僞繆雷同。推而論之。其失有五。一曰虛設。二曰厚顏。三曰假手。四曰自

虛設

戾五曰一槩何者大道爲公以能而授故堯咨爾舜
舜以命禹自曹馬已降其取之也則不然若乃上出
禪書下陳讓表其間勸進殷勤敦諭重沓跡實同於
莽卓言乃類於虞夏且始自納陛迄於登壇彤弓盧
矢新君膺九命之錫白馬侯服舊主蒙三恪之禮徒
有其文竟無其事所謂虛設也古者兩軍爲敵二國
爭雄自相稱述言無所隱何者國之得喪如日月之
蝕焉非由飾辭矯說所能掩蔽也逮于近古則不然
至于曹公歎蜀主之英略曰劉備吾儔周帝美齊宣

之強盛云高歡不死或移都以避其鋒或斷冰以防其渡及其申誥誓降移檄便稱其智昏菽麥識昧玄黃列宅建都若鵠鵠之巢葦臨戎賈勇猶螳螂之拒轍此所謂厚顏也古者詔命皆人主所爲故漢光武

厚顏

時第五倫爲督鑄錢掾見詔書而歎曰此聖主也一見決矣至於近古則不然凡有詔勅皆責成羣下但使朝多文士國富辭人肆其筆端何事不錄是以每發璽誥下綸言申惻隱之渥恩叙憂勤之至意其君雖有反道敗德惟頑與暴觀其政令則辛癸不如讀

假手

其詔誥則勛華再出此所謂假手也天子無戲言苟言之有失則取尤天下故漢光武謂龐萌可以託六尺之孤及聞其叛也乃謝百官曰諸君得無笑朕乎是知褒貶之言哲王所慎至於近古則不然凡百具察王公卿士始有褒崇則謂其珪璋特達善無可加旋有貶黜則比之斗筭下才罪不容責夫同爲一士之行同取一君之言愚智生于倏忽是非變于俄頃帝心不一皇鑒無恒此所謂自戾也夫國有否泰世有污隆作者形言本無定準故觀猗歟之頌而驗有

自戾

槩

殷方興觀魚藻之刺而知宗周將殞至於近代則不然夫談主上之聖明則君盡三五述宰相之英偉則臣皆二八國止方隅而言併吞六合福不盈時而稱感致百靈雖人事屢改而文理無易故善之與惡其說不殊欲令觀者疇爲準的此所謂一槩也於是考茲五失以尋文義雖事皆形似而言必憑虛夫鏤冰爲璧不可得而用也畫地爲餅不可得而食也是以行之於世則上下相蒙傳之於後則世人不信而世之作者復不知察聚彼虛說編而次之矧自起居成

於國史連章畢錄一字無廢非復史書更成文集若
乃類選衆作求其穢累王沉魚秦是其甚焉裴子野
何之元抑其次也陳壽于寶頗從簡約猶時載浮訛
罔盡機要惟王邵撰齊隋二史其所取也文皆諳實
理多可信至於悠悠飾詞皆不之取此實得去邪從
正之理損華撫實之義也蓋山有木工則度之況舉
世文章豈無其選但苦作者書之不讀耳至於詩有
韋孟諷諫賦有趙壹嫉邪篇則賈誼過秦論則班彪
王命張華述箴於女史張載題銘於劒閣諸葛表主

以出師王昶書家以誠子劉向谷永之上疏晁錯李固之對策荀伯子之彈文山巨源之啓事此皆言成軌則爲世龜鏡求諸歷代往往而有苟書之竹帛持之不刊則其文可與三代同風其事可與五經齊列古猶今也何遠近之有哉昔夫子脩春秋別是非申黜陟而賊臣逆子懼凡今爲史而載文也苟能撥浮華採真實亦可使夫雕蟲小技者聞義而知徙矣此乃禁淫之隄防持雅之管轄凡爲筆削者可不務乎

載言

史通曰古者言爲尚書事爲春秋自桓文作霸糾合
同盟春秋之時事之大者也而尚書闕紀秦師敗績
繆公誠誓尚書之中言之大者也而春秋靡錄此則
言事有別斷可知矣逮左氏爲書不遵古法言之與
事同在傳中然而言事相兼煩省合理故使讀者尋
繹不倦覽諷忘疲至于史漢則不然凡所包舉務存
恢博是以賈誼晁錯董仲舒東方朔等傳惟尚錄言
罕逢載事夫方述一事得其綱紀而隔以大篇分其

序叙遂令披閱之者有所惜然。後史相承不改其轍。按遷固列君臣於紀傳。統遺逸於表志。雖篇名甚廣。而言獨無錄。愚謂凡爲史者。宜于表志之外更立一書。若人主之制冊誥令。羣臣之章表移檄。收之紀傳。悉入書部。題爲制冊章表書。以類區別。他皆倣此。亦猶志之有禮樂志。刑法志。又詩人之什。自成一家。故風雅比興。非三傳所取。自六義不作。文章生焉。若韋孟諷諫之詩。揚雄出師之頌。馬卿之書。封禪。賈誼之論。過秦。諸如此文。皆施紀傳。切謂宜從古詩例。斷入

書中亦猶舜典列元首之歌。夏書包五子之詠者也。夫能使史體如是。庶幾春秋尚書之道備矣。

載言之文有答問。若止及一事。文固不難。至有數端。文實未易。所問不言。問所對不言。對言雖簡略。意實周。膽讀之。續如貫珠。應如答響。若左氏傳載楚望晉軍。問伯犁。蓋得此也。至於問則屢稱何也。答則屢稱對曰。其文與意有異。左氏若樂記載實牟賈與孔子言樂。皆據此也。二文具載。則可考矣。王曰騁。而左右何也。曰名軍吏也。皆聚于軍中矣。曰合謀也。張幕矣。

曰虔卜于先君也。徹幕矣。曰將發命也。甚囂且塵上矣。曰將塞井夷竈而爲行也。皆乘矣。左右執兵而下矣。曰聽誓也。戰乎。曰未可知也。乘而左右皆下矣。曰戰禱也。曰武夫之備戒之已久何也。對曰病不得其衆也。詠歎之淫液之何也。對曰恐不逮事也。發揚蹈厲之已蚤何也。對曰及時事也。武坐致右憲左何也。對曰非武坐也。聲淫及商何也。對曰非武音也。子曰若非武音則何音也。對曰有司失其傳也。

左氏傳載諸國燕饗賦詩之事。但云賦某詩。或云賦

某詩之卒章皆不載詩而意自具其曰賦棠棣之七章以卒則知賦七章以卒盡八章也其曰在楊水卒章之四言矣則知取我聞有命也左氏於此等文最爲得體

言以簡爲當言以載事文以著言則文貴其簡也文簡而理明斯得其簡也讀之疑有闕焉非簡也疎也如春秋隕石于宋五公羊傳曰聞其隕然視之則石察之則五公羊之義經以五字盡之是簡之難者也劉向載泄冶之言曰夫上之化下猶風靡草東風則

觀此
可知
後三
代之
文

草靡而西。西風則草靡而東。在風所由。而草所靡。此
用三十有二言。而意方顯。及觀論語曰。君子之德風。
小人之德草。草上之風必偃。此減泄治之言。半而意
亦顯。又觀書曰。爾惟風下。民惟草。此復減論語九言。
而意愈顯。吾故曰。是簡之難者也。書曰。能自得師者。
王。謂人莫已若者。亡。劉向載楚莊王之言曰。其君賢
君也。而又有師者。王。其君下君也。而羣臣又莫君若
者。亡。語意煩簡。不如是何以別經傳之文。

章句

王弼州曰首尾開闔繁簡奇正各極其度章法也抑揚頓挫長短節奏各極其致句法也點綴關鍵金石綺綵各極其造字法也篇有百尺之錦句有千鈞之弩字有百鍊之金文之與詩固異象同則孔門一唯曹溪汗下後信手拈來無非妙境

劉彥和曰夫設情有宅置言有位宅情曰章位言曰句故章者明也句者局也局言者聯字以分疆明情者總義以包體區畛相共而衢路交通矣夫人之立

言因字而生句，積句而成章，積章而成篇。篇之彪炳，章無疵也；章之明靡，句無玷也；句之清英，字不妄也。振本而末從知一，而萬畢矣。夫裁文匠筆，篇有大小，離章合句，調有緩急，隨變適會，莫見定準，句司數字，待相接以爲用，章總一義，須意窮而成體，其控引情理，送迎際會，譬舞容迴環，而有綴兆之位，歌聲靡曼，而有抗墜之節也。尋詩人擬喻，雖斷章取義，然章句在篇，如繭之抽緒，原始要終，體必鱗次，啓行之辭，逆萌中篇之意，絕筆之言，追勝前句之旨，故能外文綺

交內義脉注附萼相銜首尾一體若辭失其朋則羈
旅而無友事乖其次則飄寓而不安是以按句忌於
顛倒裁章貴於順序固情趣之指歸文筆之同致也
若夫筆句無常而字有條數四字密而不促六字格
而非緩或變之以三五蓋應機之權節也至於詩頌
大體以四言爲正唯祈父肇禋以二言爲句尋二言
肇於黃世竹彈之謠是也三言興於虞時元首之詩
是也四言廣於夏年洛汭之歌是也五言見於周代
行露之章是也六言七言雜出詩騷而體之篇成於

兩漢情數運周。隨時代用矣。若乃改韻從調。所以節文辭氣。賈誼枚乘。兩韻輒易。劉歆桓譚。百句不遷。亦各有其志也。昔魏武論賦。嫌於積韻。而善於資代。陸雲亦稱四言轉句。以四句爲佳。觀彼制韻。志同枚賈。然兩韻輒易。則聲韻微躁。百句不遷。則唇吻告勞。妙才激揚。雖觸思利貞。曷若折之中和。庶保無咎。又詩人以兮字入於句限。楚辭用之字出句外。尋兮字成句。乃語助餘聲。舜詠南風。用之久矣。而魏武弗好。豈不以無益文義邪。至於夫。惟蓋故者。發端之首。唱之

外字

而於以者。乃劄句之舊體乎。哉矣也亦送未之常科。
據事似閑在用實切。巧者迴運。彌縫文體。將令數句
之外。得一字之助矣。外字難謬。况章句歟。

六經之道。既曰同歸。六經之文。容無異體。故易文似
詩。詩文似書。書文似禮。中孚九二曰。鳴鶴在陰。其于
和之。我有好爵。吾與爾縻之。使入詩雅。孰別爻辭。抑
一章曰。其在于今。興迷亂於政。顛覆厥德。荒湛於酒。
女雖湛樂從。弗念厥紹。罔敷求先王。克其明刑。使入
書誥。孰別雅語。顧命曰。牖間南嚮。敷重篋席。黼純華。

玉仍几西序東嚮敷重底席綴純文貝仍几東序西
嚮敷重豐席畫純雕玉仍几西夾南嚮敷重筍席玄
粉純漆仍几使入春官司几筵孰別命語

夫樂奏而不和樂不可聞文作而不協文不可誦文
協尚矣是以古人之文發於自然其協也亦自然後
世之文出於有意其協也亦有意書曰任賢勿貳去
邪勿疑疑謀勿成惟熙易曰乾剛坤柔比樂師憂臨
觀之義或與或求禮記曰玄酒在室醴醕在戶淙
在堂澄酒在下陳其犧牲備其鼎俎列其琴瑟管磬

鍾鼓脩其祝嘏以降上神與其先祖以正君臣以篤父子以睦兄弟以齊上下夫婦有所是謂承天之祚若此等語自然協也書曰無偏無黨王道蕩蕩無黨無偏王道平平詩曰不明爾德時無背無側爾德不明以無陪無卿二者皆倒上句又協之一體也

韻氣一定故餘聲易遣和體抑揚故遣響難契宋詞元曲皆於仄韻用和音以叶平韻蓋以平聲爲一類而上去入三聲附之如東董是和東中是韻也

說文解豉字云配鹽幽菽也三蒼解詁字云豉真果

蟄

考

青色也。蓋豉本豆也。以鹽配之。幽閉於甕盎中所成。故曰幽菽。冥果密煎果也。以銅青浸之。加密而冥於缶中。故曰冥果。幽菽冥果。取名於幽冥。見其與生菽生果異也。解詁之妙。有如此。誰謂文章不在換字乎。鳧脰雖短。續之則憂。鶴脰雖長。斷之則悲。檀弓文句長短有法。不可增損。

長句法。如母乃使人疑夫不以情居瘠者乎哉。孰有執親之喪而沐俗佩玉者乎。賁尚不如杞梁之妻之知禮也。苟無禮義忠信誠懇之心。以蒞之。

短句法華而曉。否立孫畏。厭溺。

春秋文句。長者踰三十餘言。短者止於一言。如季孫行父。臧孫許。叔孫僑如。公孫嬰齊。帥師會晉郤克。衛孫良父。曹公子首。及齊侯戰于鞏之類。是長句也。如螽之類。是短句也。詩之文句。長者不踰八言。短者不減二言。八言者。如我不敢效我友自逸之類。是也。摯虞云。詩有九言。洄酌彼行潦。挹彼注茲。是也。然此當爲二句。其說非也。二言者。若祈父之類。春秋主於褒貶。詩則本於美刺。立言之間。莫不有法。

容齋三筆曰六經之道同歸旨意未嘗不一而用字則有不同者如佑祐右三字一也而在書爲佑在易爲祐在詩爲右惟維唯一也而在書爲惟在詩爲維在易爲唯左傳亦然又如易之無字周禮之灋祗薨蟲齏皐敝臬料閼簪等事他經皆不然今人書无咎无妄多作無失之矣孝宗初登極以潜邸爲佑聖觀令王冊官篆牌奏云篆法佑字無立人只單作右字道士力爭以爲觀名去人恐不可安有旨特增之謚以易名然則謚之爲義正訓名也司馬長卿論蜀

文曰身死無名謚爲至愚顏注云終以愚死後葉傳稱故謂之謚柳子厚招海賈文曰君不返兮謚爲愚二人所用其意則同唯王子淵簫賦曰幸得謚爲洞簫兮蒙聖主之渥恩李善謂謚者號也言得謚爲簫而常施用之以器物名爲謚其語可謂奇矣

練字

劉彥和曰、夫文象列而結繩移、鳥跡明而書契作、斯乃言語之體貌、而文章之宅宇也。蒼頡造之、鬼哭粟飛、黃帝用之、官治民察、先王聲教、書必同文、輶軒之使、紀言殊俗、所以一字體總異音、周禮保章氏掌教六書、秦滅舊章、以吏爲師、及李斯刪籀而秦篆興、程邈造隸而古文廢、漢初章律、明著厥法、太史學童教試六體、又吏民上書、字謬輒劾、是以馬字缺畫、而石建懼死、雖云性慎、亦時重文也。至孝武之世、則相如

猶音

譔篇及宣成二帝徵集小學張敞以正讀傳業揚雄以奇字纂訓並貫練雅頌總閱音義鴻筆之徒莫不洞曉且多賦京苑假借形聲是以前漢小學率多瑋字非獨制異乃共曉難也暨乎後漢小學轉疎複文隱訓臧否太半及魏代綴藻則字有常檢追觀作翻成阻輿故陳思稱揚馬之作趣幽旨深讀者非師傳不能析其辭非博學不能綜其理豈直才懸抑亦字隱自晉來用字率從簡易時並習易人誰取難今一字詭異則羣句震驚三人弗識則將成字妖矣後世

鏡
亟音

所同曉者雖難斯易時所共廢雖易斯難趣舍之間不可不察夫爾雅者孔徒之所纂而詩書之襟帶也倉頡者李斯之所輯而鳥籀之遺體也雅以淵源詰訓頡以苑囿奇文異體相資如左右肩股該舊而知新亦可以屬文若夫義訓古今興廢殊用字形單複妍蚩異體心旣託聲於言言亦寄形於字諷誦則續在官商臨文則能歸字形矣是以綴字屬篇必須練釋一避詭異二省聯邊三權重出四調單複詭異者字體瓌怪者也曹攄詩稱豈不願斯遊褊心惡咽

兩字詭異大疵美篇况乃過此其可觀乎聯邊者半
字同文者也狀貌山川古今咸用施於常文則齟齬
爲瑕如不獲免可至三接三接之外其字林乎重出
者同字相犯者也詩驗適會而近世忌同若兩字俱
要則寧在相犯故善爲文者富於萬篇貧於一字非
少相避爲難也單複者字形肥瘠者也瘠字累句則
纖疎而行劣肥字積文則黯黹而篇闇善酌字者參
五單複磊落如珠矣凡此四條雖文不必有而體例
不無若值而莫悟則非精解至於經典隱曖方冊紛

綸簡蠹帛裂三寫易字或以音譌或以文變子思弟子於穆不祀者音譌之異也晉之史記三豕渡河文變之謬也尚書大傳有別風淮雨帝王世紀云列風淫雨別列淮淫字似潛移淫列義當而不奇淮別理乖而新異傅毅制誅已用淮雨固知愛奇之心古今一也史之闕文聖人所慎若依義棄奇則可與正文字矣

字法

文有數句用一類字者。所以張文勢壯文義也。然皆有法。否則以字累句。以句累篇。其不見哂于列木爲基者幾希。引而伸之。觸類而長之。官嚙羽含矣。

或字法。詩北山曰。或燕燕居息。或盡瘁事國。或息偃在床。或不已于行。或不知叫號。或慘慘劬勞。或棲遲偃仰。或王事鞅掌。或湛樂飲酒。或慘慘畏咎。或出入風議。或靡事不爲。退之南山詩云。或連若相從。或蹙若相鬪。或妥若彌仗。或竦若驚雉。或散若瓦解。或赴

若輻輳。或翩若船遊。或決若馬驟。此句稍多不能備載。皆廣以或字法而用之也。老子曰。凡物或行。或隨。或歛。或吹。或強。或羸。或載。或隳。又一法也。

又二
法
者
矣音
浴

者。字法考工記曰。脂者。膏者。羽者。鱗者。又曰。以脰鳴者。莊子曰。激者。謫者。叱者。吸者。叫者。譟者。突者。咬者。前者。唱于。隨者。唱喁。韓退之。畫記云。行者。牽者。奔者。涉者。陸者。翹者。顧者。鳴者。寢者。叱者。噓者。嗅者。秣者。立者。齧者。飲者。洩者。陟者。降者。凡此用者字。其原出于考工記。因用莊子法也。

之謂

之。謂字法。係辭曰富有之謂大業。日新之謂盛德。生
生之謂易。成象之謂乾。效法之謂坤。極數知來之謂
占。通變之謂事。陰陽不測之謂神。韓退之賀冊尊號
表云。臣聞體仁以長人之謂元。發而中節之謂和。無
所不通之謂聖。妙而無方之謂神。經緯天地之謂文。
戡定禍亂之謂武。先天不違之謂法天。道濟天下之
謂應道。蓋取易係辭也。

謂之

謂之。字法。易係辭曰闔戶謂之坤。闢戶謂之乾。一闔
一闢謂之變。往來不窮謂之通。見乃謂之象。形乃謂

之器。制而用之。謂之法。利用出入。民咸用之。謂之神。凡經子傳記。用此多矣。故不悉載。如爾雅宮謂之室。室謂宮等法。蓋訓詁也。凱風謂南風。皆此類。

之字法。孟子曰。勞之來之。匡之直之。輔之翼之。老子曰。故道生之。畜之。長之。育之。成之。熟之。養之。覆之。若易說卦曰。雷以動之。風以散之。雨以潤之。日以烜之。艮以止之。兌以說之。乾以居之。坤以藏之。此又一法也。莊子厲之人。夜半生其子。又以驪姬作驪之姬。地名南沛。作南之沛。呂覽楚丹姬作丹之姬。家語江津。

可

可以

爲

作江之津。樂府桂樹作桂之樹。文法皆異。

可字法。考工記曰。故可規可方。可永可與。可量。表記曰。事君可貴。可賤。可富可貧。可生可殺。

可以字法。論語曰。詩可以興。可以觀。可以羣。可以怨。月令曰。可以登高明。可以遠眺望。可以升山陵。可以處臺榭。莊子曰。可以保身。可以全生。可以養親。可以盡年。

爲字法。易說卦曰。乾爲天。爲圓。爲君。爲父。爲玉。爲金。爲寒。爲冰。爲大赤。爲良馬。爲老馬。爲瘠馬。爲駁馬。爲

凡虹
雙出

必

一

不以

木果。莊子曰。形就而入。且爲顛。爲滅。爲崩。爲蹶。心和
而出。且爲聲。爲名。爲妖。爲孽。此又一法也。爾雅。蜺爲
挈貳。弁曰爲蔽。雲。暴雨謂之凍。又與謂之間用。講武
篇亦然。

必字法。考工記曰。容轂必直。陳篆必正。施膠必厚。施
筋必數。月令曰。秫稻必齊。麴蘖必時。湛熾必潔。水泉
必香。陶器必良。火齊必得。

不以字法。左氏傳曰。不以國。不以官。不以山川。不以
惡疾。不以畜牲。不以器幣。

無

無字法左氏傳曰無始亂無怙富無恃寵無違同無敖禮無復怒無謀非德無犯非義

而不

而不字法左氏傳曰直而不倨曲而不屈祀而不逼遠而不勢遷而不淫復而不厭哀而不愁樂而不荒用而不匱廣而不宣施而不費取而不貪處而不底行而不流

其

其字法係辭曰其稱名也小其取類也大其旨遠其辭文其言曲而中其事肆而急莊子曰其寢不夢其覺無憂其食不甘其息深深樂記曰其哀心感者其

聲。噍以殺。其樂心感者。其聲。嘽以緩。其喜心感者。其聲。發以散。其怒心感者。其聲。粗以厲。其敬心感者。其聲。直以廉。其愛心感者。其聲。和以柔。此雖每句用其字。而二句以見意。又一法也。

焉。字法。祭統曰。見事鬼神之道焉。見君臣之義焉。見父子之倫焉。見貴賤之等焉。見親疎之殺焉。見爵賞之施焉。見夫婦之別焉。見政事之均焉。見長幼之序焉。見上下之際焉。學記曰。藏焉。脩焉。息焉。遊焉。三年問曰。翔回焉。鳴號焉。蹢躅焉。踟躕焉。又一法也。

于時字法詩曰于時處處于時廬旅于時言言于時

語語鄭康成云時是也

實

實字法詩云實方實苞實種實褒實發實秀實堅實

見句二

好實穎實粟

曾是

曾是字法詩曰曾是疆禦曾是掎克曾是在位曾是

在服

候

候字法詩曰候主候伯候亞候旅候疆候以

有若

有若字法書曰有若號叔有若閔天有若散宜生有

若太顛有若南宮括

未嘗

未嘗字法家語曰未嘗知哀未嘗知憂未嘗知勞未嘗知懼未嘗知危

斯

斯字法檀弓曰人喜則斯陶陶斯咏咏斯猶猶斯舞

乎是

於是乎字法國語曰上帝之棗盛於是乎出民之蕃庶於是乎生事之供給於是乎在和協輯睦於是乎興財用蕃殖於是乎始敦龐純固於是乎成

有也

有字法禮器曰有直而行也有曲而殺也有經而等也有順而討也有漸而播也有推而進也有放而文

又法

又法

今

也。有放而不致也。有順而推也。樂師曰。有敝舞。有皇舞。有旄舞。有干舞。有人舞。左氏傳曰。名有五。有義。有象。有假。有類。又一法也。孟子曰。父子有親。君臣有義。

夫婦有別。長幼有序。明友有信。此又一法也。

今字法。荀子曰。井井。今其有條理也。嚴嚴。今其能敬已也。分分。今其終始也。厭厭。今其能長久也。樂樂。今其執道不殆也。炤炤。今其用知之朋也。修修。今其用統類之行也。緩緩。今其有文章也。熙熙。今其樂人之藏也。隱隱。今其恐人不當也。

然

然字法。荀子曰：儼然、壯然、祺然、肆然、恢恢然、廣廣然、昭昭然、蕩蕩然。莊子曰：注然、勃然，莫不出焉；油然、漻然，莫不入焉。

而顏音達方且

奚字法。莊子曰：奚據、奚避、奚處、奚就、奚去、奚樂、奚惡。而字法。莊子曰：而容巖然、而目衝然、而顴頰然、而狀義然。考工記曰：清其灰而盪之、而揚之、而沃之、而塗之、而宿之。又一法也。

方且字法。莊子曰：方且本身而異形。方且尊知而火馳。方且爲緒使。方且爲物絃。方且四顧而物應。方且

似
拚
難
音

乎

應衆宜方且與物化而未始有恒

似字法莊子曰似鼻似口似眼似耳似拚似圈似臼似注者似汚者

乎字法莊子曰與乎其觚而不堅也張乎其虛而不華也邴邴乎其似喜乎崔乎其不得已乎濔乎其進我色也與乎止我德也屬乎其似世乎瞽乎其未可制也連乎其似好用悅乎忘其言也禮運曰洞洞乎其敬也屬屬乎其忠也勿勿乎其欲共饗之也莊子蓋廣此法而用之

廼

廼字法詩曰廼慰廼止。廼左廼右。廼疆廼理。廼宣廼
畝。

以之

以之字法仲尼燕居曰以之居處有禮故長幼辨也
以之閨門之內有禮故三族和也以之朝廷有禮故
官爵序也以之田獵有禮故戎事閑也以之軍旅有
禮故武功成也。

足以

足以字法易曰體仁足以長人嘉會足以合禮利物
足以和義貞固足以幹事中庸曰聰明睿知足以有
臨也寬裕溫柔足以有容也發強剛毅足以有執也。

齋莊中正足以有敬也。文理密察足以有別也。又一法也。

也。字法中庸曰：修身也，尊賢也，親親也，敬大臣也，體羣臣也，子庶民也，來百工也，柔遠人也，懷諸侯也。周易雜卦一篇全用也。字。

得其
得其字法。仲尼燕居曰：宮室得其度，量鼎得其象，味得其時，樂得其節，車得其式，鬼神得其饗，喪祭得其哀，辨說得其黨。蒞官得其本，政事得其施。

以
以字法。太司樂曰：以致鬼神，以和邦國，以諧萬民，以

安賓客。以說遠人。以作動物。周禮此法極多。不能備載。

曰。字法。洪範曰。一曰水。二曰火。三曰木。四曰金。五曰土。周禮凡次叙其事。皆類此一法也。周禮小胥曰。曰風。曰賦。曰比。曰興。曰雅。曰頌。洪範曰。曰雨。曰霽。曰蒙。曰驛。曰克。曰貞。曰晦。凡此類不言數。又一法也。大宗伯曰。春見曰朝。夏見曰宗。秋見曰覲。冬見曰遇。時見曰會。殷見曰同。易象曰。天地之大德曰生。聖人之大寶曰位。何以守位曰仁。何以聚人曰財。理財正辭。禁

民爲非曰義。凡此類又一法也。

得之。字法。莊子曰。稀韋氏得之以挈天地。伏羲得之以襲氣母。維斗得之。終古不忒。日月得之。終古不息。堪坏得之以襲崑崙。馮夷得之以遊大川。肩吾得之以處大山。黃帝得之以登雲天。顓頊得之以處玄宮。禹强得之。立乎北極。西王母得之。坐乎少廣。之以。字法。禮運曰。慮之以大。愛之以敬。行之以禮。修之以孝。養紀之以義。終之以仁。

所以。字法。禮運曰。祭帝于郊。所以定天位也。祀社于

國所以列地利也。祖廟所以本仁也。山川所以備鬼神也。五祀所以本祀也。

存乎字法。係辭曰。列貴賤者存乎位。齊小大者存乎卦。辨吉凶者存乎辭。憂悔吝者存乎介。慮無咎者存乎悔。

莫大乎字法。係辭曰。法象莫大乎天地。通變莫大乎四時。懸象著明莫大乎日月。崇高莫大乎富貴。備物致用立成器以爲天下利。莫大乎聖人。

知所以字法。中庸曰。則知所以修身。知所以修身。則

矣

知所以治人。知所以治人。則知所以治天下國家矣。
矣。字法。六月詩序曰。鹿鳴廢。則和樂缺矣。四牡廢。則
君臣缺矣。下皆類此。不能悉載。板詩曰。辭之輯矣。民
之洽矣。辭之懌矣。民之莫矣。此雖每句用矣字。而上
下之意相關。

連五
字

連用五字。如韓必德。魏愛魏。重魏。畏魏。韓必不敢反。
魏甚奇。

焉謂
之間

焉。與謂之間。用如爾雅五方篇。東方有比目魚焉。不
比不行。其名謂之鰈。南方有比翼鳥焉。不比不飛。其

名謂之鵲鵲西方有比肩獸焉。與邛邛岨虛比。邛邛岨虛齧甘草。邛邛岨虛負而走。其名謂之屨。北方有比肩民焉。迭食而迭望。中有軹首蛇焉。此四方中國之異氣焉。

是以高下異。則名號異。則權力異。則事勢異。則旗章異。則符瑞異。則禮寵異。則秩祿異。則冠履異。則衣帶異。則環珮異。則車馬異。則妻妾異。則澤厚異。則官室異。則床席異。則器皿異。則祭祀異。則死喪異。服疑何字法。如天問篇句句用何字。雄視千古。

對待

造化賦形支體必雙神理爲用事不孤立夫心生文辭運裁百慮高下相須自然成對唐虞之世辭未極文而皋陶贊文罪疑惟輕功疑惟重益陳謨云滿招損謙受益豈營麗辭率然對爾易之文繁聖人之妙思也序乾四德則句句相銜龍虎類感則字字相儷乾坤易簡則宛轉相承日月往來則隔行懸合雖句字或殊而偶意一也至於詩人偶章大夫聯辭奇偶適變不勞經營自揚馬張蔡崇盛麗辭宋晝吳冶刻

言對
事對
正對
反對

形鏤法麗句與深采並流偶意共逸韻俱發至魏晉
群才析句彌密聯字合趣割毫析釐然契機者入巧
浮假者無功故麗辭之體凡有四對言對爲易事對
爲難反對爲優正對爲劣言對者雙比空辭者也事
對者並舉人驗者也反對者理殊趣合者也正對者
事異義同者也長卿上林賦云修容乎禮園翺翔乎
書圃此言對之類也宋玉神女賦云毛嫱鄣袂不足
程式西施掩面比之無色此事對之類也仲宣登樓
云鍾儀幽而楚奏莊舄顯而越吟此反對之類也孟

音蹕
蹕蹕

陽七哀云漢祖想枌榆光武思白水此正對之類也
凡偶辭胸臆言對所以爲易也擬人之譽事對所以
爲難也幽顯同志反對所以爲優也並貴共心正對
所以爲劣也又以事對各有反正指類而求萬條自
昭然矣張華詩稱遊鴈比翼翔歸鴻知接翮劉琨詩
言宣尼悲獲麟西狩泣孔丘若斯重出卽對句之駢
枝也是以言對爲美貴在精巧事對所先務在允當
若兩事相配而優劣不均是驥在左騃駑爲右服也
若夫事或孤立莫與相偶是夔之一足蹕蹕而行也

鈔

卷之三

三

十

若氣無奇類。文乏異采。碌碌麗辭。則昏垂耳目。必使
理圓事密。聯璧其章。迭用奇偶。節以雜佩。乃其貴耳。

交錯

文有交錯之體。若纏糾然。主在析理。理盡後已。書曰
念茲在茲。釋茲在茲。名言茲在茲。允出茲在茲。莊子
曰。有始也者。有未始有始也者。有未始有夫未始有
始也者。又曰。以指喻指之非指。不若以非指喻指之
非指也。荀子曰。不利而利之。不如利而後利之之利
也。利而後利之。不如利而不利者之利也。國語曰。成
人在始。與善始。與善善進。善不善蔑由至矣。始與不
善不善進。不善善蔑由至矣。穀梁曰。人之所以爲人。

者言也人而不能言何以爲人言之所以爲言者信也言而不信何以爲言信之所以爲信者道也信而不道何以爲道此類多矣不可悉舉然取莊子而法之則文斯遂矣

複

文選不收蘭亭記。議者謂絲竹管絃四言兩意非也。絲竹管絃本漢書語。古人文辭故自不厭鄭重。如易曰明辨晰也。莊子云周徧咸。又云吾無糧我無食。詩云昭明有融。高朗令終。宋玉賦旦爲朝雲。古樂府云暮不夜歸。左傳云遠哉遙遙。邯鄲淳碑云丘墓起墳。古詩云被服羅衣裳。後漢書食不充糧。在今人則以爲複矣。

詩書之文有若重複而意實曲折者。詩曰云誰之思。

文字之妙
各極其趣
所謂
有物
必有
則也

半秋
絕調

西方美人彼美人兮西方之人兮此思賢之意自曲折也又曰自古在昔先民有作此考古之意自曲折也書曰眇眇予未小子此謙托之意自曲折也又曰孺子其朋孺子其朋其往此告急之意自曲折也複字用于詩文中。最難雅馴。楊用脩取三百篇諸書之複。依均彙集。惟伐林者諗焉。

容齋隨筆載王季朗云太學士嘗戲作人焉庾哉論以人焉庾哉一句複作數轉大可噴飯

晉蘇蘭璇璣圖詩裴徊宛轉寥寥千古白雪陽春周

如意元年五月一日大周天冊金輪皇帝序曰前秦
苻堅時秦州刺史扶風竇滔妻蘇氏陳畱令武功蘇
道賢第三女也名蕙字若蘭智識精明儀容妙麗謙
默自守不求顯揚年十六歸於竇氏滔甚敬之然蘇
氏性近於急頗傷嫉妬滔字連波右將軍于夷之孫
朗之第二子也神風偉秀該通經史允文允武時論
高之苻堅委以心膂之任備歷顯職皆有政聞遷秦
州刺史以忤旨謫戍燉煌會堅克晉襄陽慮有危逼
藉滔才略詔拜安南將軍畱鎮襄陽初滔有寵姬趙

魚與能兼可漏人

更得陽臺譜人

陽臺歌舞之妙。無出其右。洎置之別所。蘇氏知之。求而獲焉。苦加捶辱。洎深以爲憾。陽臺又專伺蘇氏之短。讒毀交至。洎益忿蘇氏。蘇氏時年二十三。及洎將鎮襄陽。邀蘇氏同往。蘇氏忿之。不與偕行。廼携陽臺之任。絕蘇氏音問。蘇氏悔恨自傷。因織錦爲迴文。五綵相宣。瑩心輝目。縱廣八寸。題詩二百餘首。計八百餘言。縱橫反覆。皆爲文章。其文點畫無缺。才情之妙。超今邁古。名曰璇璣圖。然讀者不能悉通。蘇氏笑曰。裴徊宛轉。自爲語。言非我家。人莫能解之。遂發蒼頭。

連波 絕 爲 不可 爲 將

千古 情語

齋至襄陽。酒覽之。感其妙絕。因送陽臺之關中。而具
車從盛禮。迎蘇氏歸于漢南。恩好愈重。蘇氏所著文
詞五千餘言。屬隋季喪亂。文字散落。追求弗獲。而錦
字迴文。盛傳于世。朕聽政之暇。畱心墳典。散帙之次。
偶見斯圖。因述若蘭之多才。復美連波之悔過。遂製
此文。聊示將來。

載言之文。有不避重複。如穀梁傳載麗姬。故謂君曰
吾夜者夢夫人趨而來曰。吾苦畏胡。不使大夫將衛
士而衛家乎。故君謂世子曰。麗姬夢夫人趨而來曰。

吾苦畏女其將衛士而往衛家乎此不避重複一也
家語載魯公索氏將祭而忘其牲孔子聞之曰公索
氏將祭而忘其牲而夫子曰不及二年必亾今過期
而亾此不避重複二也公羊傳載陽處父諫曰射姑
民衆不悅不可使將於是廢將射姑入君謂射姑曰
陽處父言曰射姑民衆不悅不可使將此不避重複
三也及觀檀弓載子游曰昔者夫子居於宋見桓司
馬自爲石椁三年不成夫子曰若是其靡也死不如
速朽之愈也死之欲速朽爲桓司馬言之也

云曾

子以子游之言告於有子。然檀弓但云以子游之言。蓋避重複也。又左氏傳載晉師歸。郤伯見公曰。子之力也。夫范叔見勞之如郤伯。欒伯見公亦如之。夫三述晉侯之語。固未爲害。而左氏兩變其文。蓋避重複也。

孤行

天下物之孤者最貴。品之孤者最高。調之孤者寡和。注之孤者必勝。角之孤者必瑞。如金毛獅子墮地獨行。不求伴侶。奇矣哉。及乎文字。匪假發端。必藉助語。文之弊也。尚且纍纍之也。若若乎而。謂尚書無一也字。不駭且笑。豈有文至千萬。不相複襲。而辭理燦然者哉。然亦有數家。各自爲體。妙出天然。或文字接屬。而理義炳蔚。如周興所撰千文。詞古節迫。四言一韻。鏗鏘如響。隋潘徽所撰萬文。實追其蹤。或不接不屬。而

通音叶響律呂相宣如韻會所收萬二千六百五十二字合之則平上去入共歸其母分之而陰陽平仄自叶其均中雖有複文而音屬轉注或一字數音義隨音異而聲響懸殊亦不可爲同如近世千家姓亦復可觀皆以一言成句一字成書真天地間絕奇之體寥寥千古可謂獨而無耦孤而寡和者矣與夔之一足跚蹕而行者異矣文章微妙夫言豈一端而已也

贋

贋書之作。情狀至繁。約而言之。殆十數種。有僞作於前代而世率知之者。風后之握奇。岐伯之素問是也。有僞作於近代而世反惑之者。卜商之易傳。毛漸之連山是也。有掇古人之事而僞者。仲尼傾蓋而有子華。柱史出關而有尹喜是也。有挾古人之文而僞者。伍員著書而有越絕。賈誼賦鵬而有鵬冠是也。有傳古人之名而僞者。尹負鼎而湯液聞。戚飯牛而相經著是也。有蹈古書之名而僞者。汲冢發而師春補。檮

杞紀而楚史傳是也。有憚于自名而僞者。魏泰筆錄之類是也。有耻于自名而僞者。和氏香奩之類是也。有假重于人而僞者。子瞻杜解之類是也。有惡其人僞以禍之者。僧儒行紀之類是也。有惡其人僞以誣之者。聖俞碧雲之類是也。有本非僞人托之而僞者。陰符不言三皇而李荃稱黃帝之類是也。有書本僞人附之而益僞者。乾坤鑿度及諸緯書之類是也。又有僞而非僞者。洞靈真經本王士元所補。而以僞充倉。西京雜記本葛稚川所傳。而以僞劉歆之類是也。

又有非僞而僞者。文子載於劉歆七略。歷梁隋皆有其目。而黃東發以爲徐靈府抱朴紀於勾漏本傳。歷唐宋皆志其書。而黃東發以非葛稚川之類是也。又有非僞而實僞者。化書本譚峭所著。而宋齊丘竊而序傳之。莊注本向秀所作。而郭子玄取而點定之。類是也。又有當時知其僞而後世弗傳者。劉炫魯史之類是也。又有當時記其僞而後人弗悟者。司馬潛虛之類是也。又有本無撰人。後人因近似而僞托者。山海稱大禹之類是也。又有本有撰人。後人因亡逸而

文通

卷之三

賈

三十八

偽題者。正訓稱陸機之類是也。

援引

凡伯刺厲之詩而曰先民有言。吉甫美宣之詩而曰人亦有言。胤侯之征乃舉政典。盤庚之誥亦載遲任。或稱古人言。或稱我聞曰。是皆有所援引也。

凡傳中引古典必曰書云詩云者正也。左傳中最多。又有變例如子產答子皮云子於鄭國棟也。棟折榱崩。僑將壓焉。此乃引周易棟橈凶之義而不明言易。魯穆叔論伯有不敬曰濟澤之阿。行潦之蘋藻。真記宗室季蘭尸之敬也。此乃引有齊季女全詩之義而

不明言詩蓋一法也。又引書太誓所謂商兆民離周
十人同者衆也。據太誓原文云：受有億兆夷人，離心
離德。予有亂臣十人，同心同德。省二十字作八字而
語益矯健。此蓋省字又一法也。却至聘楚辭言云：百
官承事，朝而不夕。此公侯所以干城其民也。故詩曰：
赳赳武夫，公侯干城。及其亂也，諸侯貪冒，侵欲不已。
爭尋常以盡其民，略其武夫以爲己腹心。故詩曰：赳
赳武夫，公侯腹心。此先言詩意而後引詩辭又一法
也。

攷宋陳文簡曰古文取詩云詩取書云書蓋常也

或以康誥爲先王之令見國語周書爲西方之書見國語

以咸有一德爲尹誥禮語以大禹謨爲道經荀子不

曰仲虺之誥而曰仲虺之志左氏不曰五子之歌而

曰夏訓有之左氏直言鄭詩曹誥國語上稱汧曰武

曰左氏或稱芮良夫左氏或稱周文公國語指那頌

卒章爲亂辭國語摘小宛首章爲篇目國語數章之

末章旣謂之卒章一章之末句亦謂之卒章並左氏傳凡

此似亦略施雕琢少變雷同作者致爲毋誚無補陳氏

之言。予論有契焉。

節節引起者。如大學邦畿章。中庸尚聚章。節節引詩起奇絕。

後漢伏湛奏引書股肱良哉。庶事康哉。又詩濟濟多士。文王以寧。不直引其文。而曰唐虞以股肱康。文王以多士寧。是故詩稱濟濟。書曰良哉。湛之言亦有左氏國語之遺法乎。晉以後不復有此工緻矣。

譬况

記曰君子知至學之難易而知其美惡然後能博喻。能博喻然後能爲師。又曰罕譬而喻夫惟博故能也。宋陳騏曰易之有象以盡其意詩之有比以達其情文之作可無喻乎抑嘗攷之詩之比似矣易之象皆本自然非聖人因象後畫故象不可爲譬喻以其皆實事非寓言也。各爻亦隨爻爲象亦非寓言。張橫渠曰象皆實體所謂仰觀俯察取象物宜非寓言也。卦爻小象容有寓言。楊信州曰小象亦無寓言如豕

負塗載鬼一車。歐陽公疑之。遂指謂非聖人之言。以
事理斷之。豕安能負塗。車安得載鬼。至于一車乎。極
爲不通險忤之論。然以象求則爻之乘承比應。內有
豕象。有負象。有塗象。有鬼象。有載象。有一車象。合之
爲辭。所謂以疑事爲象。亦以意取象。所以取是義者。
雖以意得之。實睽卦內所有。合而相比。乃見其如此。
若有似于寓言。而實有此象。據睽爲言。故謂六爻皆
實事。非寓言也。然則象之與譬。況有間矣。太古之人。
範世訓俗。有直言者。有曲言者。直言者直以情貢也。

曲言者。假以指喻也。言之致曲。則其傳也久。傳久。詭
僞則智者正之。譌甚而殺亂。則智者正之。天地一指
也。萬物一馬也。寓言十九。在莊生自言之。淮南子曰。
說山說林者。所以竅窅穿鑿。百事之壅遏。而通行。貫
肩萬物之窒塞者也。假譬取象。異類殊形。以領理人
之意。懈墮結細說。捍搏困。而以明事。埒事者也。噫。六
書已有假借。而釋氏全用此法。以瀉漣心。愈博愈罕。
生機。罔然矣。

假喻

曰假喻。如黃帝鼎湖之事。曰采銅鍊剛質也。登彼首

山者就高明也。大鑪者鼓陽化也。神鼎者熟物之器也。上水而下火。二氣升降。濟中和也。羣龍者衆陽也。雲龍屬也。帝鄉者靈臺之關也。治成而上。則精微所徹。去人遠矣。羣小臣智識不及。攀龍子胡有見於下也。不得上昇。無見於上也。無見於上者士也。上下無見者民也。弓裘衣冠。善世利俗之具也。民懷之而已。號以決慕藏。以奉其傳也。

並喻

曰直喻。或言猶。或言若。或言如。或言似。灼然可見。孟子曰。猶緣木而求魚也。書曰。若朽索之馭六馬。論語

曰譬如北辰莊子曰淒然似秋此類是也

隱喻

曰隱喻其文雖晦義則可尋禮記曰諸侯不下漁色
國語曰歿平公軍無秕政又曰雖竭譖焉避之左氏
傳曰是豢吳也夫公羊傳曰其諸侯爲其雙雙而俱
至者與此類是也

類喻

曰類喻取其一類以次喻之書曰王省惟歲師尹惟
日卿士惟月歲日月一類也賈誼新書曰天子如堂
羣臣如陛衆庶如地堂陛地一類此類是也

詰喻

曰詰喻雖爲喻文似成詰難論語曰虎兕出於柙龜

對喻

玉毀於櫝中。是誰之過歟。左氏傳曰。人之有牆以蔽惡也。墻之隙壞。誰之咎也。此類是也。

對喻先比後證。上下相符。莊子曰。魚相忘乎江湖。人相忘乎道術。荀子曰。流丸止于甌臯。流言止于知者。

博喻

曰博喻。取以爲喻。不一而足。書曰。若金。用汝作礪。若濟巨川。用汝作舟楫。若歲大旱。用汝作霖雨。荀子曰。猶以指測河也。猶以戈舂黍也。猶以錐殮壺也。此類是也。

簡喻

曰簡喻其文辭略而意甚明左氏傳曰名德之興也

詳喻

曰詳喻須假多辭然後義顯荀子曰夫耀蟬者務在其明乎火振其木而已火不明雖振其木無益也今人主有能明其德則天下歸之若蟬之歸明火也此類是也

引喻

曰引喻援取前言以證其事左氏傳曰諺所謂庇焉而縱尋斧焉者也禮記曰蟻子時術之其此之謂乎此類是也

虛喻

曰虛喻。既不指物。亦不指事。論語曰。其言似不足者。老子曰。應易似無所止。此類是也。

王省惟歲。卿士惟月。師尹惟日。喻也。天子如堂。羣臣如陛。衆如地。亦喻也。京邑猶身。王畿猶臂。四方猶指。亦喻也。文章蹊徑遠矣哉。

楊用修曰。秦漢以前。書籍之文。言多譬況。當求於意外。尚書云。說築傅巖之野。築之爲言居也。後世猶有卜築之稱。求其說而不得。遂謂傳說起于版築。雖孟子亦誤矣。伊尹負鼎以干湯。謂尹有鼎鼐之才也。猶

書曰。迂衡云耳。橫議者。遂謂伊尹爲庖人。若然。則衡秤也。尹曰。迂衡。其亦舞秤權之市魁乎。子貢多學而識之。故孔子曰。賜不受命而貨殖焉。莊子便謂子貢乘大馬。中紺表素之衣。太史公立貨殖傳。便首誣子貢。如此。則子貢一猗頓耳。聖門四科。子貢善言語。太史公信戰國游士之說。載子貢一出。存魯亂齊。破吳強晉而霸越。其文震耀。其辭辯利。人皆信之。雖朱文公亦惑之。獨蘇子由作古史考。而知其妄。考左傳。齊之伐魯。本于悼公之怒季姬。而非田常。吳之伐齊。本

怒悼公之反覆而非子貢。其事始白。若如太史公之言。則子貢一蘇秦耳。毛詩曰。漢有游女。不可求思。韓嬰曲爲之說曰。孔子南行至楚之阿谷。見女子有佩璜而浣者。使子貢挑之不得。如韓嬰之言。則孔子乃一馬融。而子貢不如盧植遠矣。又論語爲命禪讓草創之。左氏遂謂禪讓謀于野則獲。蓋因草之一字誣之也。孔父正色而立朝。左氏遂謂孔父之妻美而艷。蓋因色之一字誣之也。例此以往。則國語謂驪姬竭譖申生。必將如吉甫之掇蜂。禮所云諸侯漁色于下。

卽小說家謂西施因綢得之類矣

語曰得意忘象得象忘言諸如此類真可謂罕譬而喻善繼其志者哉

助辭

夫文章之變化無窮矣。必有餘音。足句爲其始末。是以伊惟夫。蓋發語之端也。焉哉矣兮。斷句之助也。去之則不足。加之則有餘。厥有定理。而史之叙事。時亦類此。故將述晉靈公厚斂彫牆。則且以不君爲稱。欲云司馬安四至九卿。而先以巧宦標目。所謂說事之端也。書重耳伐原示信。而續以一戰而霸。文之教也。書匈奴爲偶人象郅都令馳射。莫能中。則云其見憚如此。所謂論事之助也。寄抑揚於片言隻字之間。有

雋永者矣。

文有助辭猶禮之有賓樂之有相也禮無賓則不行樂無相則不諧文無助則不順檀弓曰勿之有悔焉耳矣孟子曰寡人盡心焉耳矣檀弓曰我弔也與哉左氏傳曰獨吾君也乎哉凡此一句而三字連助不嫌多也左氏傳曰王事無乃闕乎又曰其無乃是也乎此二者六字成句而四字爲助亦不嫌其多也檀弓曰南宮縚之妻之姑之喪樂記曰不知手之舞之足之蹈之也凡此不嫌用之字爲多禮記曰言則大

此字而無也紛不

矣美矣。此不嫌用矣字。爲多檀弓曰美哉輪焉美哉
負焉。論語曰富哉言乎。凡此四字成句而助辭半之
不如是文不健也。左氏傳曰美哉泱泱乎大風也哉。
表東海者其太公平國未可量也。此文每句終用助
辭讀之殊無齟齬艱辛之態。左氏傳曰以三軍軍其
前欲見下軍字有陳列之意則當用其字爲有力。公
羊傳曰入其大門則無人門焉者欲見下門字有守
禦之意則當用焉者字爲有力。

毛詩語助如只且忌止思而何斯旃其之類後所罕

此

其施斯何而思 止忌且只

用只字如母也天只不諒人只且字如椒聊且遠條
且狂童之狂也且既亟只且忌字如叔善射忌又良
御忌止字如齊子歸止曷又懷止女心傷止思字如
不可求思爾竿來思今我來思而字如俟我於著乎
而充耳以素乎而何字如如此良人何如此粲者何
斯字如恩斯勤斯鬻子之閔斯彼何人斯施字如舍
旃舍施其字音基如夜如何其子曰何其皆是也忌
唯見於鄭詩而唯見於齊詩楚詞大招全用只字太
玄經其人有輯抗可與過其些字獨招蒐用之耳

奪胎

古人文法皆有祖。韓非內儲說曰。門人求水而夷射誅。濟陽自矯而二人罪。鄭袖言臭惡而新人剗。費無忌教却死而令尹誅。陳需殺張壽而犀首走。燒芻廩而中山罪。殺老儒而濟陽賞。班固漢書曰。子翬謀桓而魯隱危。欒書構却而晉厲弑。豎牛奔走叔孫卒。郈伯毀季昭公逐。費忌納女楚建走。宰嚭譖胥夫差喪。李園進妹春申斃。上官譖屈懷王執。趙高敗斯二世。謚伊戾坎盟宋。座死江充造。蠱太子殺。息夫作姦。東

平誅。宋景文唐書效之爲姦臣贊曰。三宰嘯凶。牝奪
展。林甫將藩黃屋奔。鬼質敗謀興元。蹙崔柳倒植李。
宗覆。東坡贈宋壽昌詩。用此法又奇矣。

後漢肅宗詔曰。父戰於前。子死於後。弱女乘于亭障。
孤兒號於道路。老母寡妻。設虛祭。飲泣淚。想望歸魂。
於沙漠之表。豈不哀哉。李華弔古戰場文。祖之。陳陶
隴西行云。可憐無定河邊骨。猶是春閨夢裏人。可謂
奪胎之妙。

郭象莊子注曰。工人無爲於刻木。而有爲於運矩。主

上無爲於親事。而有爲於用臣。柳子厚演之爲梓人傳一篇。凡數百言。毛萇詩傳曰。漣風行水成文也。蘇老泉演之爲蘇文甫字說一篇。亦數百言。得奪胎換骨之三昧也。

倒法

宋陳騭曰。倒言而不失其言者。言之妙也。倒文而不失其文者。文之妙也。文有倒語之法。知者罕矣。春秋書曰。吳子謁伐楚。門於巢。卒公羊傳曰。門於巢。卒者何。入巢之門而卒也。然夫子先言門。後言於巢者。於文雖倒。而寓意深矣。何休曰。吳子欲伐楚。過巢。不假塗。卒暴入巢門。門者以爲欲犯巢而射殺之。故與巢得殺之。若吳爲自死。死又所以疆守禦也。仲山甫誠歸於謝。詩則曰。謝于誠歸。隱盜所得器。左氏傳則曰。

此義
本之
洪容
齋楊
用修
升銘
亦載

盜所隱。器于義皆不害也。禹貢曰。厥篚玄纁。縞又曰。
雲土夢作乂。用纁字不在玄上。土字不在夢下。亦一
倒法也。司馬遷作夏本紀。改曰雲夢土作乂。烏足與
知此。

焦弱侯曰。古文多倒語。如息之爲長。亂之爲治。擾之
爲順。荒之爲定。臭之爲香。潰之爲遂。瘵之爲祥。結之
爲解。坐之爲跪。浮之爲沉。面之爲背。糞之爲除。皆美
惡相對之字。而反其義以用之。如天地盈虛。與時消
息。訓長也。亂臣十人。亂越我家。惟以亂民。亂爲四方。

新辟。亂爲四輔。厥亂明我新造邦。丕乃俾亂之類。以
亂訓治也。安擾邦國。擾而毅。擾龍六擾之類。以擾訓
順也。荒度土功。遂荒大東。大王荒之。葛藟荒之以荒
訓定也。其臭如蘭。衿纓皆佩。容臭。胡臭。亶時其臭。羶
臭。陰達于淵泉。以臭訓香也。是用不潰于成。莫不潰
茂。以潰訓遂也。將以釁鍾。以釁訓祥也。親結其綱。以
結訓解也。則皆坐奠之。而後取之。以坐訓跪也。越浮
西子於江。以浮訓沈也。馬童面之。面縛銜璧。面規渠
而改錯。以面訓背也。爲長者糞。以糞訓除也。

湯霍林曰。今人文絕不知有倒法。文之脉在動動則轉轉之妙全在用倒。昔人所悟升裏轉斗裏轉地理家所謂橫來直受。陽來陰受。皆轉法耳。至倒法尤難明。有意倒者有句倒者。古人文意深遠。旁見側出。卒無不用倒者。今人尚不知順何言倒哉。

接屬

文有上下相接若繼踵然其體有三。其一曰敘。積小至大如中庸曰能盡其性則能盡人之性能盡人之性則能盡物之性能盡物之性則可以贊天地之化育可以贊天地之化育則可以與天地參矣此類是也。其二曰敘由精及粗如莊子曰古之明大道者先明天而道德次之道德已明而仁義次之仁義已明而分守次之分守已明而形名次之形名已明而因任次之因任已明而原省次之原省已明而是非次

之是非已明而賞罰次之此類是也其三曰敘自流
極原如大學曰古之欲明明德於天下者先治其國
欲治其國者先齊其家欲齊其家者先脩其身欲修
其身者先正其心欲正其心者先誠其意欲誠其意
者先致其知此類是也

告戒答問

唐虞三代君臣之間告戒答問之言雍容溫潤自然成文及春秋名卿才大夫輩爭重詞命婉麗華藻咸有古義秦漢以來上之詔命皆出親製自後不然凡有王言悉責成臣下而臣下又自有章表是以束帶立朝之士相尚博洽肆其筆端徒盈篇牘甚至於駢儷其文俳諧其語所謂代言與夫奏上之體俱失之矣

數事

數音所人行事其體有三或先總而後數之如孔子謂子產有君子之道四焉其行已也恭其事上也敬其養民也惠其使民也義此類是也或先數之而後總之如子產數鄭公孫黑曰爾有亂心無厭國不女堪專伐伯有而罪一也昆弟爭室而罪二也董隧之盟女矯君位而罪三也有死罪三何以堪之此類是也或先旣總之而後復總之如孔子言臧文仲其不仁者三不知者三下展禽廢六關妾織蒲三不仁也作

虛器縱逆祀祀爰居三不知也此類是也

目人列氏

文有目人之體。有列氏之體。論語曰。德行顏淵閔子騫冉伯牛仲弓。言語宰我子貢。政事冉有季路。文學子游子夏。此目人之體也。而揚雄班固得之。左氏傳曰。殷氏六族。條氏。徐氏。蕭氏。索氏。長勺氏。尾勺氏。此列氏之體也。而莊周司馬遷得之。

蹈襲

歷觀經傳之文有相類者。非固出於蹈襲。實理之所
在不約而同也。略條于後。則可推矣。詩曰。禮義不愆。
何恤於人言。左氏傳載士蔿稱諺曰。心苟無瑕。何恤
乎無家。詩曰。謂予不信。有如皦日。左氏傳載公子重
耳曰。所不與舅氏同心者。有如白水。詩曰。不愆遺一
老。俾守我王。左氏傳魯哀公誅孔丘曰。不愆遺一老
俾屏予一人。以在位。此不約而同一也。左氏傳曰。晉
韓起聘。魯觀書於太史氏。見易象與魯春秋。曰。周禮

盡在魯矣。吾乃今知周公之德與周之所以王也。家語曰：孔子適周，歷郊社之所，攷明堂之則，祭廟朝之度，於是喟然曰：吾乃今知周公之聖與周之所以王也。此不約而同二也。左氏傳曰：晉侯疾病，求醫于秦，秦伯使醫緩爲之醫，至曰：疾不可爲也。在肓之上，膏之下。戰國策曰：扁鵲見秦武王，武王示之病，扁鵲請除左右曰：君之病在耳之前，目之下，此不約而同三也。左氏傳載周子曰：二三子用我，今日否亦今日國語載吳王曰：狐之事君在，今日不得事君亦在，今日。

此不約而同四也。國語載觀射父曰：先王之祀也，以一純二精三牲四時五色六律七事八種九祭十日十二辰以致之。左氏傳載晏子曰：先王之濟五味和五聲以平其心，成其政也。聲亦如味，一氣二體三類四物五聲六律七音八風九歌以相成也。此不約而同五也。攷工記曰：柶爲上，桴次之，楬次之，水鼓次之，荆次之，禮器曰：禮時爲大，順次之，體次之，宜次之，稱次之。此不約而同六也。